

Inatsisartuni Naalakkersuisunilu il. il. ilaasortat aningaasarsiaqartitaanerat il. il. pillugit Inatsisartut inatsisaat

Kapitali 1

Inatsisartuni ilaasortat

Aningaasarsiat, aningaasartuuteqarnermut tapit, ineqarnermut tunngasut, angalanermi aningaasartuutit ilaqquttanillu ingiallorneqartarneq

§ 1. Inatsisartuni ilaasortat akissaatit inissisimaffiat 35 malillugu aningaasarsianik tapisianik tamanut atuuttunik ilasanik, skalali malillugu tamanut atuuttunik tapisiaqanngitsunik immikkullu tapi-sianik kr. 49.340-inik ukiumut tunngaviusumik aningaasartalinnik, ukiumut aningaasarsiaqartinneqassapput. Aningaasarsiat naatsorsorneqassapput AK-mut isumaqatigiissut ulloq 1. april 2002-mi atuuttoq aallaavigalugu.

Imm. 2. Inatsisartuni ilaasortatut atuunnermut atatillugu aningaasartuuteqarnermi matussutissanik soraarnerussutisiaqaataasussaannngitsunik ukiumut kr. 50.000-inik tapisiaqartitsisoqassaaq.

Imm. 3. Aningaasarsiat tapisiallu imm. 1 aamma 2-mi taaneqartut qaammammut siumoortumik tunniunneqartassapput. Aningaasarsiat imm. 1-imi taaneqartut iluarsiivigineqartarnerisa AK-mut tunngasumi isumaqatigiinniartarnermi ineriartorneq malittaraat. Imm. 2 malillugu tapisiaq ukiumut ataasiarluni qaammatisiutit malillugit ukiorisap aallartinnerani nunatsinni akinut iluarsiiissut malillugu iluarsiivigineqartassaaq. Imm. 2 malillugu tapisiaq iluarsiivigineqarnera siullesq 2004-mi pissaaq.

Imm. 4. Inatsisartuni ilaasortat Nuummi aalajangersimasumik najugaqarnissamik kissaateqartut inissaqartinneqassapput, inissianilu Namminersornerullutik Oqartussat attartortittagaanni ineqar-nermut akiliutinik naatsorsuisarnermi maleruagassat qanoq ilisukkulluunniit atuuttut naapertorlugit ineqarnerminnut akiliuteqartinneqassapput. Inatsisartuni ilaasortanut Nuummi najugaqareersunut, Inatsisartunili atuunnerminnik aalussineq pissutigalugu suliffigisaminnik ilinniarnerminnilluunniit unitsitsisut taamaalillutillu atorfirmut atatillugu inigisaminnik ilinniarnertulluunniit ineqarfianni inigisaminnik qimatsisariaqartut pillugit aamma tamanna atuuppoq. Najukkamiit najukkamut nuunnermi aningaasartuutit atorfilinnut (AK) maleruagassat atuuttut malillugit matussusiivigineqartassapput, imaalillugilli, Inatsisartuni ilaasortap atuuffni ukiunit pingasunit sivikinnerusumik isumagisimagaluarpaguluunniit nuunnermi aningaasartuutit matussusiivigineqassallutik.

Imm. 5. Inissiat Inatsisartuni ilaasortanut atugassiissutigineqartut Inatsisartuni ilaasortaaneq atuukkunnaarpat qimanneqassapput.

Imm. 6. Piffissami ilaasortaajunnaarnersiaqarfimmi utaqqiisaasumik ineqartitsisoqassaaq. Inissi-ani

Namminersornerullutik Oqartussat attartortittagaanni ineqarnermut akiliutit naatsorsorneqartarnerinut maleruagassat qanoq ilisukkulluunniit atuuttut naapertorlugit ineqarnermut akiluiteqartoqartassaaq. Piffissaq ilaasortaajunnaarnersiaqarfik naappat inigisaq qimanneqassaaq.

§ 2. Inatsisartuni ilaasortaq qaammammi siullermi ullormi taassuma aallaqqaataani qinigaanerup akuersissutigineqarfianit aningaasarsiaqartinneqalerlunilu aningaasartuuteqarnermut tapisiaqartinneqalissaaq. Ilaasortap allap toqunera Inatsisartunilunniit ilaasortatut tunuavinnera pissutigalugu ilaasortaq atuutilersimappat, qaammatip toquffiup ilaasortatulluunniit tunuaviffiup aallaqqaataanit aningaasarsiaqartitsisoqalissaaq. Aningaasarsiat aningaasartuuteqarnermullu tapisiat qaammatip Inatsisartuni ilaasortaajunnaarfiup naanerani atuukkunnaassapput.

Imm. 2. Inatsisartuni ilaasortaq Kalaallit Nunaanni Inatsisartut Suleriaasianni maleruagassat naapertorlugit ilaasortatut sulinngiffeqarallarnissamik Inatsisartut Siulittaasoqarfiannit akuersissuteqarfigneqartoq aningaasarsianik aningaasartuuteqarnermullu tapisianik piffissami sulinngiffeqarallarfirmiini pisinnaangilaq. Inatsisartut Siulittaasoqarfiat sulinngiffeqarallarallarnernup akuersissutigineqarnissaanut najoqqutassanik suliarinnissaaq. Immikkut ittumik pisuni sin-niisussamik aggersaarnermut atatillugu aningaasartuutit akilernerqarnissaat sulinngiffeqarallarnermik akuersinissamut tunngavissanngortinneqarsinnaavoq.

Imm. 3. Inatsisartut Siulittaasoqarfiata Inatsisartuni ilaasortaq sulinngiffeqarallarnissamik akuersissuteqarfigippagu piffissami sulinngiffeqarallarnermi pineqartoq soraarnerussutisiassanik katersissanngilaq. Aamma Inatsisartuni ilaasortaq Naalakkersuisuni ilaasortatut atuuffimminik tamakkiisumik aallussiniarniini pissutigalugu sulinngiffeqarallarnissamik akuersissuteqarfigneqartoq piffissami sulinngiffeqarallarnermi soraarnerussutisiaqalernissamut katersisinnaangilaq.

Imm. 4. Napparsimaneq qanigisalluunniit toquneranut perululluniluunniit napparsimaneranut atatillugu najuutinnginneq pissuteqavilluni najuutinnginnertut isigineqassaaq.

Imm. 5. Naartunermut, erninermut meeravissiartaarnermulluunniit atatillugu sulinngiffeqarallarneq pissuteqavilluni najuutinnginnertut isigineqassaaq.

§ 3. § 1, imm. 2-mi tapisiat Inatsisartuni ilaasortap Inatsisartuni ilaasortatut atuunnermini aningaasartuutigiunnagaanut matussutissaapput.

Imm. 2. Ilaasortanut Nuummi najugaqanngitsunut Inatsisartut ataatsimiinnerinut atatillugu angalaneq ineqarnerlu kiisalu ullormusiat tjenestemandinut maleruagassat atuuttut malillugit akiliussissutigineqassapput.

Imm. 3. Qinnuteqaateqarneq tunngavigalugu Inatsisartut Siulittaasoqarfiannit Inatsisartulluunniit siulittaasuannit aalajangerneqarsinnaavoq ataatsimiititaliat ataatsimiinnerini ataatsimiititalialluunniit angalanerini peqataanermi angalaneq ineqarnerlu kiisalu ullormusiat maleruagassat tjenestemandinut atuuttut naapertorlugit akiliussissutigineqassasut, kiisalu ullormusiaqartitsisoqassalluni.

Imm. 4. Inatsisartuni ilaasortat qaammatisiutit malillugit ukiut tamaasa aningaasanut killiliussat 50.000-inik amerlassusillit iluini Kalaallit Nunaanni paasisassarsiorlutik angalasinnaatitaapput, tak.-li imm. 5. aningaasat atunngitsuukkat ukiup naanerani atorunnaassapput.

Imm. 5. Inatsisartuni sinniisussaq piffissami killiligaanngitsumi Inatsisartuni ilaasortamut taartaasoq imm. 4 naapertorlugu Inatsisartuni ilaasortap pineqartup paasisassarsiorluni angalasinnaatitaaneraniq atuillissaaq. Qaammatisiutit malillugit ukiup naanerani aningaasat atunngitsuukkat atorunnaassapput.

Inatsisartuni sinniisussap atuunna qaammatisiutit malillugit ukioq naanngitsoq atorunnaarpat aningaasat atunngitsoorneqarsimasinnaasut Inatsisartuni ilaasortamut, sulinngiffeqarnera qaangiuttumut, nuunneqassapput.

Imm. 6. Inatsisartut Siulittaasoqarfiat angalanissamut pilersaarussiaq tunngavigalugu siumoorutitik tunniussinissamut najoqqutassiussaaq kiisalu paasisassarsiorluni angalanermut atatillugu akiliutit utertinneqartarnerannut maleruagassiussalluni.

Imm. 7. Piffissami Inatsisartunut qinersinissap nalunaarutigineqarnerata qinersinerullu akuersissutigineqarnerata akornanni Inatsisartuni ilaasortat angalaneri, ataatsimiinnerit kinguartinneqarsinnaangitsut pineqarsimanngippata, Landskarsimit akilerneqarsinnaanngillat.

§ 4. Ilaasortanut Nuummi najugaqanngitsunut qaammatisiutit malillugit ukiut tamaasa ataasiarluni Inatsisartuni ilaasortap aapparisa Inatsisartut ataatsimiinnerannut atatillugu ingialluinermi angalanermut ineqarnermullu akiliunneqartassaaq.

Imm. 2. Aappariinnermut naligititaassaaq inuit aqqisa allattorsimaffianni najugaqatigiittut nalunaarsorneqarluni ukiumi ataatsimi inooqatigiinneq.

Imm. 3. Ilaasortanut Nuummi najugaqanngitsunut qaammatisiutit malillugit ukiut tamaasa ataasiarluni Inatsisartuni ilaasortap qitornai 18 inorlugit ukiullit angerlarsimaffimmi najugallit Inatsisartut ataatsimiinnerannut atatillugu ingialluinermi angalanermut ineqarnermullu akiliunneqartassapput.

Imm. 4. Inatsisartuni ilaasortaq Naalakkersuisuni ilaasortaajutigippat aapparisa qitornaaluunniit Inatsisartut ataatsimiinnerannut atatillugu ingialluinermi angalanermut ineqarnermullu akiliunneqassanngillat.

Inatsisartuni ilaasortat sinniisussaat

Aningaasarsiat, aningaasartuuteqarnermut tapit, angalanermi aningaasartuutit ilaqquttanillu ingiallorneqartarneq

§ 5. Inatsisartuni ilaasortat sinniisussaat Inatsisartuni ilaasortamut taartaaffitik ullut tamaasa aningaasarsiat § 1, imm. 1-imi taaneqartut 1/365-erarterutaannik aningaasarsiaqartinneqassapput. Aammattaaq sinniisussaq aningaasartuuteqarnermut tapisianik § 1, imm. 2-miittut 1/365-erarterutaannik tapisiaqartinneqassaaq.

Imm. 2. Aamma sinniisussaq § 3, imm. 2-mi maleruagassaq naapertorlugu angalanermut ineqarnermullu akiliunneqassaaq kiisalu ullormusiaqartinneqassalluni.

Imm. 3. Inatsisartut Siulittaasoqarfiannut qinnuteqarneq tunngavigalugu sinniisussap aapparisa qitornaalu angerlarsimaffimmi najugallit 18-it inorlugit ukiullit, sinniisussallu angajoqqaatut oqartussaaffigisai, Inatsisartut ataatsimiinnerannut, sinniisussap Inatsisartuni ilaasortaq taarserlugu piffissami sapaatip akunnerinit pingasunit sivisunerusumik ataatsimeeqataaffigisaanut ingialluinermi angalanermut ineqarnermullu akiliunneqarsinnaapput. § 4, imm. 2 aamma taamatut atuutissaaq.

Kapitali 2

Inatsisartut siulittaasuat, Naalakkersuisut siulittaasuat Naalakkersuisunilu ilaasortat

*Aningaasarsiat, ineqarnermut tunngasut, ilassinninnermut aningaasartuutit, angalanermi aningaasartuutit
ilaquttanillu ingiallorneqartarnek*

§ 6. Inatsisartut siulittaasuat, Naalakkersuisut siulittaasuat Naalakkersuisunilu ilaasortat aningaasarsiat § 1, imm. 1-imi taaneqartut saniatigut akissaatit inissisimaffiat 38 malillugu aningaasarsianik tapisianik tamanut atuuttunik ilasanik, skalali malillugu tamanut atuuttunik tapisiaqanngitsunik, aningaasarsiaqartinneqassapput. Aningaasarsiat naatsorsorneqassapput AS - G-mut isumaqatigiissut ulloq 1. april 2002-mi atuuttoq aallaavigalugu.

Imm. 2. Inatsisartut siulittaasuannut Naalakkersuisullu siulittaasuannut kr. 120.930-nik immikkut tapisiaqartitsisoqassaaq.

Imm. 3. Naalakkersuini ilaasortanut Inatsisartuni ilaasortaanngitsunut Inatsisartuni ilaasortat aningaasarsiaasa § 1, imm. 1-imi taaneqartut angeqataannik tapisiaqartitsisoqassaaq.

Imm. 4. Inatsisartut siulittaasuat, Naalakkersuisut siulittaasuat Naalakkersuisunilu ilaasortat qaammatip qinigaaffimmik aallaqqaataanit qaammatip taamatut atuukkunnaarfimmik naanissaata tungaanut aningaasarsiaqartinneqassapput. Aningaasarsiat qaammammut siumoortumik tunniunneqassapput. Imm. 1 - 3-mi taaneqartutut aningaasarsiat tapisiallu iluarsiivigineqartarnerisa AS - G-mi isumaqatigiinniuteqartarfimmi ineriartorneq malittaraat.

Imm. 5. Inatsisartut siulittaasuat Naalakkersuisullu siulittaasuat akeqanngitsumik ineqartinneqassapput. Naalakkersuisuni ilaasortat sinnerinut atorfimmut atasumik ineqartitsisoqassaaq, taakkununanilu inissiani Namminersornerullutik Oqartussat atorfimmut atasumik pinngitsoorani inigisassatut inigitittagaanni ineqarnermut akiliutinik naatsorsuisarnermi maleruagassat qanoq ilisukkulluunniit atuuttut naapertorlugit ineqarnermut akiliuteqartitsisoqassalluni.

Imm. 6. Inatsisartut siulittaasuat Naalakkersuisullu siulittaasuat Inatsisartut siulittaasuattut Naalakkersuisullu siulittaasuattut atuukkunnaarunik akeqanngitsumik inigisaminnit nuussapput. Inigisat Naalakkersuisuni ilaasortat sinnerinut inigitinneqartut Naalakkersuisuni ilaasortaajunnaarnermi qimanneqassapput.

Imm. 7. Piffissami ilaasortaajunnaarnerisiaqarfimmi utaqqiisaasumik ineqartitsisoqassaaq. Inissianut Namminersornerullutik Oqartussat attartortittagaannut ineqarnermut akiliutit naatsorsorneqartarnerinut maleruagassat qanoq ilisukkulluunniit atuuttut naapertorlugit ineqarnermut akiliuteqartitsisoqartassaaq. Piffissaq ilaasortaajunnaarnerisiaqarfik naappat inigisaq qimanneqassaaq.

§ 7. Inatsisartut siulittaasuat, Naalakkersuisut siulittaasuat Naalakkersuisunilu ilaasortat Lands-karsip akiligaanik ilassinninnermi aningaasartuuteqarsinnaatitaapput.

§ 8. Inatsisartut siulittaasuata, Naalakkersuisut siulittaasuata Naalakkersuisunilu ilaasortat Inatsisartut siulittaasuattut, Naalakkersuisut siulittaasuattut Naalakkersuisunilu ilaasortatut angalaneri Landskarsimit akilerneqassapput.

Imm. 2. Nerisaqarnermut ineqarnermullu aningaasartuutit kingusinnerusukkut Landskarsimit akilerneqartussanngorlugit akiligassaq malillugu matussuserneqartassapput.

Imm. 3. Immikkut pissutissaqartillugu Inatsisartut siulittaasuata, Naalakkersuisut siulittaasuata Naalakkersuisunilu ilaasortat Inatsisartut siulittaasuattut, Naalakkersuisut siulittaasuattut

Naalakkersuisunilu ilaasortatut suliaminnut atatillugu angalaneranni aapparisaat inooqatigisalluunniit angalaqatigineqarsinnaapput. § 8, imm. 2 aamma taamatut atuutissaaq.

Imm. 4. Naalakkersuisuni ilaasortap aapparisaanut Nuup avataani illoqarfigisaminiiginnarluni aalajangertumut qaammatisiutit malillugit ukiut tamaasa marloriarluni Nuummumut angalanermut akiliussisoqartassaaq. § 4, imm. 2 aamma taamatut atuutissaaq.

Imm. 5. Aammattaaq Naalakkersuisuni ilaasortap qitornaanut 18-it inorlugit ukiulinnut Nuup avataani angerlarsimaffimmi najugalinnut qaammatisiutit malillugit ukiut tamaasa marloriarluni Nuummumut angalanermut akiliussisoqartassaaq.

Kapitali 3

Inatsisartut siulittaasuata, Naalakkersuisut siulittaasuata Naalakkersuisunilu ilaasortat allanik atuuffeqarsinnaaneri

§ 9. Inatsisartut siulittaasuata, Naalakkersuisut siulittaasuata Naalakkersuisuniluunniit ilaasortaq ivertinneqarnermi nalaani allanik atuuffeqartoq taakkunannga tunuassaaq.

Imm. 2. Inatsisartut siulittaasuata, Naalakkersuisut siulittaasuata Naalakkersuisuniluunniit ilaa-sortap atuuffiit taakku ingerlatiinnarumallugit kissaatigippagu Qinersinerup Misilinneqarnissaanut Ataatsimiititaliaq tamanna pillugu erngerluni nalunaarfigissavaa. Nalunaarutip tiguneraniit sapaatip akunneri pingasut qaangiutinnginnerini pineqartup atuuffimminik taamaattunik ingerlatsiinnarnissaa ataatsimiititaliap itigartitsissutigisinnavaa.

Imm. 3. Inatsisartut siulittaasuata imm. 2-mi piffissaliussap naanerata kingorna atuuffiit sorliit ingerlatiinnarnissaannut siulittaasup akuerineqarnera Inatsisartunut nalunaarutigissavaa. Naalakkersuisut siulittaasuata, Naalakkersuisut siulittaasuata Naalakkersuisunilu ilaasortat atuuffiit sorliit ingerlatiinnarnissaannut akuerineqarnersut Inatsisartut siulittaasuannut nalunaarutigissavaa.

Imm. 4. Inatsisartut siulittaasuata, Naalakkersuisut siulittaasuata Naalakkersuisunilu ilaasortat atuuffinnik pineqartunik ingerlatsinermik saniatigut atuuffinnik nutaanik Qinersinerup Misilinneqarnissaanut Ataatsimiititaliaq akuersereersimatinnagu tiguseqqusaanngillat.

Kapitali 4

Ilaasortaajunnaarnersiat

§ 10. Inatsisartuni Naalakkersuisuniluunniit ilaasortatut atuuffimmit tunuarnermi pineqartup § 1, imm. 1 - mi kiisalu § 6, imm. 1- 3-mi qaammammumut isertittagaasa angeqataannik ilaasortaajunnaarnersiaqartitsisoqassaaq.

Imm. 2. Pineqartup katillugu piffissami atuuffigisimasaani ukiup atuuffiup aallartinneri tamaasa qaammatip aappaa qeqqanut naatsorsuullugit ilaasortaajunnaarnersiat tunniunneqartassapput.

Imm. 3. Naalakkersuisuni ilaasortatut tunuarnermi piffissaq Naalakkersuisutut atuuffigisimasaq tunngavigalugu ilaasortaajunnaarnersiaqartitsisoqassaaq.

Imm. 4. Inatsisartuni ilaasortatut tunuarnermi piffissaq Inatsisartuni ilaasortatut atuuffigisimasaq tunngavigalugu ilaasortaajunnaarnersiaqartitsisoqassaaq.

Imm. 5. Imm. 1 malillugu ilaasortaajunnaarnersiat sivikinnerpaamik qaammatinut pingasunut sivilunerpaamillu qaammatinut aqqaneq marlunnut, qaammammumut siumoortumik, tunniunneqassapput.

Imm. 6. Inatsisartuni sinniisussaq, piffissami sivilissusissaa aalajangigaanngitsumi Inatsisartuni ilaasortap atuuffianiilersoq, piffissap atuuffiup naanerani ilaasortaajunnaarnersianik, § 5, imm. 1, oqaaseqatigiit siulliit malillugit, pineqartup ullormut aningaasarsiarisartagaasa angeqataannik ani-ngaasartallimmik tunineqassaaq. Sinniisussap piffissami sivilissusissaa aalajangigaanngitsumi Inatsisartuni ilaasortamut taartaaffigisimasaanut ilaasortaajunnaarnersiat tuniunneqassapput. Ilaasortaajunnaarnersiat pineqartup ullut arfineq-pingasukkaarlugit atuuffigisaanut ullormut ataatsimut naatsorsuullugit tunniunneqassapput. Ilaasortaajunnaarnersiat qaammammut siumoortumik tunniunneqassapput.

Imm. 7. Ilaasortaajunnaarnersianik tunniussisoqareersimatillugu atuuffimmut pineqartumut ilaasortaajunnaarnersiaqarsinnaaneq sivikillineqassaaq. Ilaasortaajunnaarnersiat anginerpaaffissaannik tunniussisoqarsimappat atuuffimmut pineqartumut ilaasortaajunnaarnersiaqarsinnaaneq aningaasartaarutsinneqassaaq.

Imm. 8. Inatsisartuni sinniisussatut atuuffimmut ilaasortaajunnaarnersianik aamma Inatsisartuni ilaasortatut Inatsisartuniluunniit sinniisussatut atuuffimmut aningaasarsianik ataatsikkut tigusaqartoqarsinnaanngilaq, aamma atuuffinnut taakkununga marlunnut ilaasortaajunnaarnersiummik ataasiinnarmik tunniussisoqarsinnaavoq. Ilaasortaajunnaarnersiaqarnissaq atuuffinni piffissaq atuuffiusoq tamakkerlugu tunngavigalugu naatsorsorneqassaaq. Ilaasortaajunnaarnersiaq atuuffinni arlalinni piffissaq atuuffigisimasaq ataaseq tunngavigalugu tunniunneqartoq sivilunerpaamik qaammatinut 12-inut tunniunneqarsinnaavoq.

Imm. 9. Inatsisartut siulittaasuut Naalakkersuisuni ilaasortanut maleruagassat atuuttut naapertorlugit ilaasortaajunnaarnersiaqassaaq. Inatsisartut siulittaasuattut aamma Naalakkersuisuni ilaasortatut atuuffinnut ilaasortaajunnaarnersiutinik aningaasarsianillu ataatsikkut pisoqarsinnaan-ngilaq, aamma atuuffinnut taakkununga marlunnut ilaasortaajunnaarnersianik ataasiinnarmik tunniussisoqarsinnaavoq. Atuuffinni piffissaq ataatsimut atuuffiusoq tunngavigalugu ilaasortaajunnaarnersiaqarsinnaaneq naatsorsorneqassaaq.

Kapitali 5

Aapparisaq qitornallu aningaasarsiaqartitaaneri ilaasortaajunnaarnersiaqartitaanerilu

§ 11. Inatsisartut siulittaasuata, Naalakkersuisut siulittaasuata, Naalakkersuisuni ilaasortap Inatsisartuniluunniit ilaasortap taamatut atuutsilluni toqusup aapparisaq qaammatini pingasuni aningaasarsianik tiguisinnaatitaavoq. Qaammammut aningaasarsiat Inatsisartut siulittaasuata, Naalakkersuisut siulittaasuata, Naalakkersuisuni ilaasortap Inatsisartuniluunniit ilaasortap § 1, imm. 1 kiisalu § 6, imm. 1 - 3 naapertorlugit qaammammut isertittagaasa angeqatigaat.

Imm. 2. Pineqartoq ilaasortaajunnaarnersianik tigusaqartoqarsimappat piffissap ilaasortaajunnaarnersiaqarfiup sinnerani aapparisaq ilaasortaajunnaarnersianik tiguisinnaatitaavoq. Aapparisarli sivilunerpaamik qaammatini pingasuni ilaasortaajunnaarnersianik tiguisinnaatitaavoq.

Imm. 3. Inatsisartut siulittaasuut, Naalakkersuisut siulittaasuut, Naalakkersuisuni ilaasortaajunnaarnersianik ilaasortaajunnaarnersianilluunniit tiguisinnaatitaaffigisaani qaammatit pingasut qaangiutinngitsut toquppat, qitornat 18 inorlugit ukiullit, ilaasortaajunnaarnersiutinik tiguisinnaatitaasup toqunerani pineqartumit angajoqqaatut oqartussaaffigineqarpata, taakku aningaasarsiaqarsianik tiguisinnaatitaalerlutillu ilaasortaajunnaarnersianik tiguisinnaatitaallissapput.

Kapitali 6

Soraarnerussutisiat

§ 12. Inunnut, Inatsisartunut, Naalakkersuisunut il.il. ilaasortat aningaasarsiaqartitaanerit il.il. Inatsisartut inatsisaat nr. 11 28. oktober 1993-imeersoq imaluunniit Inatsisartunut, Naalakkersuisunut il.il. ilaasortat aningaasarsiaqartitaanerit il.il. Inatsisartut inatsisaat nr.17 7. december 2001-imeersoq naapertorlugu, soraarnerussutisiaqarsinnaalersunut §§ 13-16-imi maleruagassat malillugit soraarnerussutisiaqartitsisoqassaaq.

§ 13. Soraarnerussutisiaqarsinnaanermut tunngavigineqassaaq pineqartup Naalakkersuisuni ilaasortatut piffissami ataatsimi arlalinnilluunniit katillugit sivikinnerpaamik ukiumik ataatsimik sivilissusilimmik ingerlatsisimanissaa, Inatsisartuniluunniit ilaasortatut piffissami ataatsimi arlalinnilluunniit, katillugit sivikinnerpaamik ukiumik ataatsimik sivilissusilimmik ingerlatsisimanissaa.

Imm. 2. Pineqartoq 60-inik ukioqalersimappat, atuuffimmut aningaasarsianik ilaasortaajunnaarnersianilluunniit qaammatip tunniussiviup naanerani soraarnerussutisianik tunniussisoqassaaq, taamaattoqanngippallu ukiut taakku anguneqarnerisa kingorna qaammatip ulluisa siulliannit.

Imm. 3. Ilaasortaq soraarninngorsimasooq, atuuffimmut soraarnerussutisiaqarfigisaminut nutaamik atuuteqqilersooq, piffissami, aningaasarsianik ilaasortaajunnaarnersianilluunniit tunniussiviusumi soraarnerussutisiaqassanngilaq.

§ 14. Inatsisartuni ilaasortat soraarnerussutisiaasa ukiut atuuffiit aallartinneri tamaasa naatsorsuutigalugit atorfilittut atorfimmi akissaatit inissisimaffianni 31, skalatrin 44-mi soraarnerussutisiat qaffasinnerpaaffiattut anguneqartup 1/20-erai. Soraarnerussutisiat qaffasinnerpaaffissaat ukiut 20-it atuutereernermi anguneqassaaq.

§ 15. Inatsisartut siulittaasuata, Naalakkersuisut siulittaasuata Naalakkersuisunilu ilaasortat soraarnerussutisiaat ukiut atuuffigisat aallartinneri tamaasa soraarnerussutisiat, atorfilittut ator-fimmi akissaatit inissisimaffianni 39, skalatrin 52-mit soraarninngornermi, tamanut atuuttumik tapisiat ilanngunnagit, soraarnerussutisiat qaffasinnerpaaffiattut anguneqartup 1/20-erai. Soraarnerussutisiat qaffasinnerpaaffissaat ukiut 20-it atuutereernermi anguneqassaaq.

§ 16. Apparisamut qitornanullu soraarnerussutisiat maleruagassat tjenestemandinut atuuttut naapertorlugit tunniunneqassapput.

Imm. 2. §§-it 14, 15 aamma 16 imm. 1, malillugit soraarnerussutisiat maleruagassat tjenestemandinut atuuttut naapertorlugit iluarsivigineqartassapput.

Imm. 3. Inatsisartut inatsisaanni taaneqartutut atuuffiit ilaannit ataatsimit ulloq 1. januar 2004 nallertinnagu inuk tunuarsimappat, atuuffimmullu tassunga atuuffinnilluunniit taakku ilaannut arlalinnut soraarnerussutisianik katersukkanik soraarnerussutisiaqarsinnaatitaappat soraarnerussutisiaqarpalluunniit, soraarnerussutisiat katillugit tunniunneqartut § 15 malillugu soraarnerussutisiarineqarsinnaasut qaffasinnerpaaffiattut taamaallaat angissuseqarsinnaapput.

Imm. 4. Inatsisartut inatsisaanni taaneqartunit atuuffimmit atuuffinnilluunniit arlalinnit inuk soraarnerussutisiaqartoq, ullorlu 1. januar 2004 nallertinnagu atuuffimminit tunuarsimasoq, pisortani atorfimmit allamit aningaasarsiaqarsinnaatitaappat, akissarsiaqarsinnaatitaappat soraarnerussutisiaqarsinnaatitaappalluunniit, Inatsisartut inatsisaat una malillugu soraarnerussutisiai ilanngarneqassapput, taamaalilluni aningaasarsiat, akissarsiat soraarnerussutisiallu katillutik § 15, imm. 1 malillugu soraarnerussutisiarineqarsinnaasut qaffasinnerpaaffiattut taamaallaat angissuseqarsinnaanngorlugit.

Imm. 5. Inatsisartuni Naalakkersuisuniluunniit siusinnerusukkut ilaasortaasimasoq ulloq 1. januar 2004 nallertinnagu Inatsisartuni Naalakkersuisuniluunniit ilaasortatut atuuffimminit tunuarsimappat, kingusinnerusukkullu Inatsisartunut Naalakkersuisunulluunniit qinigaappat, imm. 3 aamma imm. 4 atorneqassanngillat.

§ 17. Inatsisartut inatsisaata atortuulersinneqarnerani Inatsisartuni Naalakkersuisunilu ilaasortanut, aningaasarsiat il.il. pillugit Inatsisartut inatsisaat nr. 11 28. oktober 1993-imeersoq aamma Inatsisartuni Naalakkersuisunilu il.il. ilaasortatut aningaasarsiaqartitaanerat il.il. pillugit Inatsisartut inatsisaat nr. 17 7. december 2001-imeersoq naapertorlugit soraarnerussutianik aqqissuussinerit ulloq 31. december 2003 killigalugu katersukkatut inissinneqassapput.

Imm. 2. Inatsisartut inatsisaata atuutilerfianit atuutilersumik soraarnerussutisiaqarnermut aqqissuussinermik inunnut ataasiakkaanut naatsorsuussamik soraarnerussutisiaqarfimmi Kalaallit nunaanniitumi Inatsisartuni Naalakkersuisunilu ilaasortanut ingerlaavartumik tunniussisarfirmik pilersitsisoqassaaq. Soraarnerussutisiaqarnermik aqqissuussivimmu ilaatinneqassapput utoqqalinermi soraarnerussutisiaat, apparisap qitornallu soraarnerussutisiaat.

Imm. 3. Imm. 2-mi soraarnerussutisiaqarnermik aqqissuussinermut taaneqartumut Inatsisartuni Naalakkersuisuniluunniit ilaasortap ataatsip aningaasarsiaasa 10%-iinik ingerlaavartumik tunniussisoqartassaaq. Aammattaaq Inatsisartuni Naalakkersuisuniluunniit ilaasortap ataatsip aningaasarsiaasa 5%-iinik ingerlaavartumik ilanngaassuisoqartassaaq. Aningaasat ilanngaatigineqartartut tassapput Inatsisartuni Naalakkersuisuniluunniit ilaasortap soraarnerussutisiaqarnermik aqqissuussinermut imm. 2-mi taaneqartumut nammineerluni akiliutai.

Kapitali 7

Inatsisartuni ilaasortaangitsut ataatsimiititaliani, nævnini, sinniisoqarfinni taamaaqataannilu peqataaneri

§ 18. Inatsisartuni ilaasortaangitsunut ataatsimiititaliani, nævnini sinniisoqarfinnilu Namminersornerullutik Oqartussat sinnerlugit atuuffimmik isumaginnittunut ullormut ataatsimut aningaasarsianik § 1, imm. 1-mi taaneqartut 1/365-erarterutaannik aningaasarsiaqartitsisoqassaaq. Aammattaaq najugarisaq qimallugu ataatsimiinnermut peqataanermi angalanermut ineqarnermullu akiliussisoqassaaq kiisalu ullormusianik maleruagassat tjenestemandinut atuuttut naapertorlugit tunniussisoqartassaaq.

Imm. 2. Inatsisartuni ilaasortaangitsunut ataatsimiititaliani, nævnini sinniisoqarfinnilu imm. 1-mi taaneqartuni immikkut annertuumik suliaasaqarfiusumik siulittaasuuffimmik atuuffilinnut tapisianik Naalakkersuisut aalajangersaasinnaapput. Tapisiat qaammammoortumik siumoortumik

tunniunneqartassapput, tunniunneqartarunnaassallutillu siulittaasuuneup atuukkunnaarneranit qaammatip naanerani, Naalakkersuisulluunniit atuukkunnaartitsinissamik aalajangiippata.

Kapitali 8

Piginnaatitsissut

§ 19. Inatsisartut Siulittaasoqarfiat Naalakkersuisut isumaqatiginiareerlugit Inatsisartut inatsisaat una naapertorlugu maleruagassanik erseqqinnerusunik aalajangersaasinnaavoq.

Kapitali 9

Atortuulersitsineq il. il.

§ 20. Inatsit una ulloq 1. januar 2004-imi atortuulissaaq.

Imm. 2. Tamatuma peqatigisaanik Inatsisartut inatsisaat nr. 11 ulloq 28. oktober 1993-imeersaq Inatsisartunut, Naalakkersuisunut il. il. ilaasortat aningaasarsiaqartitaanerat il.il. kiisalu Landsrådimut, Inatsisartunut, Naalakkersuisunut il. il. ilaasortaasimasut soraarnerussutisiaqartinneqarnerat pillugu inatsit aamma Inatsisartut inatsisaat nr. 17 ulloq 7. december 2001-imeersaq Inatsisartunut Naalakkersunullu il. il. ilaasortat aningaasarsiaqartitaanerat il. il. pillugit inatsit atorunnaarsinneqarput.

Imm. 3. Taamaattorli Kalaallit Nunaata Landsrådianut aamma Kalaallit Nunaata Landstingianut sivisuumik ilaasortaasimasunut soraarnerussutisiaqartitsinermik aqqissuussineq pillugu Landstingip inatsisaani nr. 3-mi ulloq 16. maj 1979-imeersumi ("Ataqqinaammik tunissutisitsisarneq pillugu inatsit") aamma Landsstyremut il. il. ilaasortaasimasunut soraarnerussutisiaqartitsineq pillugu landstingip inatsisaani nr. 7-imi ulloq 14. juli 1982-imeersumi kiisalu Kalaallit Nunaanni Naalakkersuisunut, Landsrådimut, Inatsisartunut il.il. ilaasortaasimasut soraarnerussutisiaqartinneqarnerat pillugu Inatsisartut inatsisaat nr. 4 9. juni 1986-imeersaq maannakkut tunniuttakkat piginnaatitaaffillu maannamutut angissuseqarlutik, maleruagassallu maannamut atuuttut malillugit, aalajangersakkat taakku malillugit piginnaatitaaffit taakku atuukkunnaarnissaasa tungaanut, tunniunneqassapput.

Namminersornerullutik Oqartussat, ulloq 18. december 2003

Hans Enoksen

/

Kaj Kleist

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut